

Q. D. B. V.

EXERCITATIO PHYSICA,

DE

VAPORIBUS

NEBULA & NUBIBUS,

Quam

SUB PRÆSIDIO

JO. ADAMI KULMI,

Med. D. ejusd. & Phys. P.P.O.

atque Acad. Nat. Cur. Sodal.

IN AUDITORIO ORDINARIO

A.O.R. MDCCXXVI. Die XXIX. Nov.

hora IX. antemerid.

defendet

RESPONDENS,

CHRISTIANUS FRIDERICUS  
CHARITIUS, Gedanens.

---

GEDANI,

Typis THOMÆ JOHANNIS Schreiber,  
MAGNÆ. SENAT. & ATHENÆI  
TYPOGRAPHI.



VIRO  
GENEROSO MAXIMEQUE  
STRENUO,

DNO. JOANNI  
CONSTANTINO  
FERBERO,

MAECENATI, PATRONO  
*impense ac sancte colendo*

hasce myricas  
in  
meritorum hypothecam  
dat dedicat

FERBERIANÆ DIGNITATIS


*Cliens devotissimus*  
RESPONDENS.



# Conspectus.

§. I. *Aquam ære esse repletam.* §. II. *Quomodo vapores generentur?* §. III. *De Vaporum causa.* §. IV. *de effluviis diversitate.* §. V. *An frigus vapores constringat?* §. VI. *Quid nebula?* §. VII. *Quomodo illa generetur?* §. VIII. *Qua ratione vapores præcipitentur?* §. IX. *Qua ratione nebula ascendat?* §. X. *Quid Nubes?* §. XI. *Qua ratione nubes dissipentur?* §. XII. *Qua causa illæ condensentur?* §. XIII. *Unde nubium motus?* §. XIV. *Quam alte nubes ferantur?*

## §. I.

 Mnem aquam ære esse repletam, varia experimenta abunde testantur: quod si enim aqua vasculo quodam excepta sub Antliæ campanam ponitur, frequentes exsurgunt *bullulæ exiguæ*, quoties aer sub illa campana contentus & vasculum ambiens evacuat. Esse autem has bullulas nihil aliud, quam aërem vesiculis aqueis inclusum, inde evidenter apparet, quia sub quavis iterata extractione emboli (qua majus spatium aëri elastico sub campana conceditur) bullulæ istæ non solum copiosiores subito ex aqua prorumpunt, sed etiam lateribus vitri adherentes semper in majorem molem expanduntur, quo sollicitius aer ambiens excluditur: hac enim ratione aer in vesiculis istis vi suæ elasticitatis, ob minorem aëris ambientis resistantiam, fortiori nisu sese dilatat. (*vid. Exercit. Nostr. de Aëre §. 5. & seqq.*), ut ita bullulæ ipsæ necessario in majorem molem expandantur. Assurgere autem aërem per aquam sub bullularum forma, alio facili experimento innotescit: quando lagena vitrea arctiori collo prædita aquæ profundè immergitur, observabimus copiosas bullulas successive per aquam sursum propullulantes & in superficie dehiscentes, quæ ab aqua lagenam intrante, tanquam corpore aëre graviore, expelluntur.



## §. II.

Si itaque aër in mari aut flumine à quacunq; causa adeo expanditur, ut vesicularum moles aëre atmosphærico inferiori specificè levior fiat, tunc pari ratione; ut sub campana (§. præced.) copiosæ bullulæ adscendunt. Hæ bullulæ s. vesiculæ sunt *Vapores*, qui propter specificam suam levitatem à reliqua aqua separantur, & ob validiorem aquæ, cui cedunt, pressionem sursum propelluntur. Cum vero aëris atmosphærici regio inferior superiori multo densior & ponderosior sit (*Exercit. Nost. de Aëre §. 13.*), oportet vapores ascensum suum eousque sursum versus continuare, donec ad illam aëris altitudinem perveniant, ubi cum aëre ambiente eandem gravitatem specificam servant: ibi subsistere coguntur, nec alius surgere valent, propter æqualem nisum & renisum. Demonstravit autem *Celeb. Christ. Wolffius* in *Phys. sua Experimental. Germ. idiom. T. II. §. 85.* aërem atmosphæricum 800. vicibus esse specificè leviores aquâ; unde sequitur, guttulas aquosas mole sua decies esse augendas, si bullulæ ex aqua adscendere, & per aërem inferiorem altius surgere debeant: quo simul patet, aërem in vesiculis istis inclusum necessario multo rariorem esse, magisque elasticum, quam aërem atmosphæricum inferiorem, per quem adscendunt.

## §. III.

Quoniam aër guttulas aquosas in majorem molem sub vesicularum forma expandere valet, certo colligimus, aquam gaudere visciditate quadam & esse corpus elasticum; alias vel minima aëris extensione facile difrumperentur globuli: hinc omne illud, quod aëris elaterem auget, ejusmodi vesiculas aquosas s. vapores efficere capax est. Constat autem per quotidianam experientiam, *calorem Solis* mirum in modum elaterem aeris intendere: quando itaque radii Solares aquam calefaciunt, reddunt quoque aerem in illa contentum rariorem, qui dilatatus majorem molem occupare nititur, unde moleculas aquosas expandit & vesiculas format, quæ alleviatæ per aquas adscendunt & in auram abeunt. Hac ratione calor Solis corpora quæcunque humida exsiccant & arida reddit.

## §. IV.



#### §. IV.

Non autem solum maria & aquæ, quæ in Tellure reperiuntur, ejusmodi vesiculas continuo emittunt, sed exhalant etiam ex omnibus corporibus reliquis, tam animatis, quam inanimatis, in universo globo Terraqueo varia effluvia, quæ pari modo in atmosphæra cumulantur. Omnes vesiculæ tali modo ascendentes in genere dicuntur *effluvia*; ipsa vesicularum per atmosphæram dispersio dicitur *exhalatio* vel *evaporatio*: ipsæ vesiculæ humidæ assurgentes audiunt proprio nomine *vapores*; secretiones vero ex animalibus, aut aliis corporibus solidis indefinenter emissæ *exhalationes* appellantur, de quarum copia & diversitate vid. *Sanctorius* in Medicina Statica, & *Boyleus* de atmosphæra corporum consistentium. Sunt autem effluvia alia crassiora, alia tenuiora: crassiora obhærent in inferiori aeris regione propter majorem gravitatem specificam; tenuiores vero altius evehuntur. Est igitur Aer commune & amplissimum receptaculum variorum effluviiorum, quæ ex omnibus corporibus successive secedunt.

#### §. V.

Aer in vesiculis istis calore expansus elatere suo in aura frigidiori non statim privatur, quoniam exiguæ illæ vesiculæ sphæricæ ab aere atmosphærico difficulter constriunguntur: cumulantur tamen ab aere densiore in coarctatum acervum, & hæc est ratio, quare tempore frigido, præsertim matutino vel vespertino vapores aquosi citius in conspectum veniant, quam tempore calido meridiano, ubi illi per majus spatium dissipantur. Sic tempore frigido halitus oris & copiosi vapores ex rivis instar fumi densissimi assurgentes conspiciuntur.

#### §. VI.

Vapores altius hinc inde per atmosphæram dispersi propter exiguitatem in oculos non incurrunt; ast in vicinia Nebulam constituunt. Est itaque *Nebula* congeries vaporum aquosorum, tanta copia in aere inferiori cumulatorum, ut conspectum aliorum corporum in vicinia existentium impediant. Constare autem nebulam ex vaporibus aquosis, luculenter ostendunt res nebulæ expositæ & homines in ea commorantes, qui paulatim humore madefiunt.



## §. VII.

Nebula semper conspicitur in infima regione aeris, & quoniam ibi vapores sunt crassiores, & frigore adhuc in arctius spatium condensantur; sequitur, nebulam generari ex vaporibus crassissimis frigore condensatis. Cum autem æstivo tempore vapores admodum rarefacti in aere atmosphærico nimis alte ascendant; crassiores vero nocturno tempore per roridas guttulas subito præcipitentur, igitur rarissime per Æstatem generantur Nebulæ: è contrario, autumnali & hyemali tempore frequentes fiunt Nebulæ, quia tum temporis vapores sunt crassiores & ab aere pariter graviori magis condensantur, adeoque in inferiori atmosphæræ loco per longiorem moram obhærescunt. Præterea, quoniam nocturno frigore vapores & aer magis constriunguntur, apparent nebula matutino aut vespertino tempore, quæ deinde Sole altius elevato depelluntur. Denique eo tempore, quo Nebula conspicitur, nullus observatur ventus, sed tempestas admodum tranquilla: ventus enim vapores cumulatos agitat, dissipat, ac impedit, quo minus in arctiorem acervum compelli queant.

## §. VIII.

Quando vapores nebulosi respectu aeris atmosphærici, in quo hærent, graviore fiunt, tunc pondere acquisito graviore, propter sublatum æquilibrium in tellurem delabuntur. Contingit hoc duplici modo: vel quando plures vapores per fortio rem aeris ambientis collisionem in conglobatas coeunt moleculas, sicque ponderosiores fiunt; vel quando ipse aer inferior ob variam causam levioris fit ponderis, ut ita vapores jam specificè graviore reddita per illam descendant atque præcipitentur. Quoniam post nebulam præcipitatam aer copiosis vaporibus pluviosis depuratur, sequitur ut plurimum tempestas serena, quam vel ipse vulgus frequenti experientia ex nebula decidente prædicere consuevit. Est tamen hoc serenitatis indicium non semper verum: quodsi enim nebula propter aërem atmosphæricum rarefactum decidat, facile alii vapores ex regione superiori in nebula locum succedere, aut à vento quodam levissimo depelli possunt.

## §. IX.



### §. IX.

Nebula, licet sit densissima, non tamen semper præcipitatur, sed quandoque dispellitur aut altius elevatur, quando nempe vel aër ambiens densior & ponderosior redditur, vel vapores nebulae leviores fiunt: utroque casu mutatur quoque gravitatis æquilibrium. Redditur autem aër, nebulam suffulciens, gravior vel ab aere superiori fortius incumbente, aut à vento quodam, aerem valide comprimente, unde vapores aere per accidens specificè leviores existentes sursum comprimuntur. Vapores vero per se attenuantur & leviores fiunt mediante calore, quando vel radii Solares illos calore suo rariores & leviores reddunt; vel quando ventus ex calida quadam regione advectus elaterem aeris vaporibus inclusi adaugēt, qui vesiculas in maiorem molem expandit & specificè leviores reddit: quapropter vapores vel dissipantur, vel in aere altius elevantur. Propter elevatam nebulam atmosphæra copiosis imprægnatur humoribus, quare postmodum præsentē hac causa materiali facile pluvia oritur, si vel Sole altius surgente, vel excitato aliquo vento æquilibrium atmosphærae denuo mutatur.

### §. X.

Quando nebulae non dissipantur, sed earum vapores collecti altius evehuntur, proveniunt jam inde *Nubes*. Esse enim Nubes non nisi nebulas è longinquo visas, illorum experientia docet, qui cælo nubilo existente montes præaltos adscendentes, se quasi per nebulam transiisse comperti sunt: quapropter nebulae & nubes variatâ duntaxat distantia differunt. Videntur autem Nubes nebulis esse spissiores, cum tamen earum vapores pari intervallo sint disseminati: spatium enim amplissimum ex loco disito observatum multo minoris dimensionis dijudicatur, quam illud revera est, quoniam singulae ejus partes invicem proprius confunduntur, igitur etiam vapores in nubibus eo arctius videntur congregati, quo remotius à nobis conspiciuntur.

### §. XI.

Resolvuntur quandoque Nubes in vapores rariores, qui postea



postea dissipati non amplius conspiciuntur. Contingit hæc *nubium resolutio*, quando aer ambiens vel ab incumbente superiori, vel alio laterali fortius insistente compellitur, cui jam ponderosiori facto nubes specificè leviores cedere debent. Et cum ab aëre fortius premente paulatim sursum propellantur, ita facile hi vapores nubium in altiori & ampliori aeris regione delati fufius disseminari, & à levissimo quodam vento penitus dissipari possunt, ut ita largius à se invicem segregati omnem visum effugiant.

#### §. XII.

Ex eadem causa haut difficulter constabit, *Nubes reddi spissiores*, quando aër ambiens attenuatur: quod ex varia causa provenire observatur, inprimis si aër superior inferiori non adeo valide incumbat; illo namque debilius premente resistentia inferioris minuitur, qua debilitata vapores proprio suo pondere descendunt, & arctius coëunt. Reputantur etiam *nubes densiores*, quando earum vapores sibi alius cumulantur, licet non arctius coëant: ejusmodi enim nubes Soli & oculo nostro interpositæ pauciores radios transmittunt, quam alia, quæ propter minorem dimensionem pellucidiores existunt.

#### §. XIII.

Quoniam vapores in illa aëris regione commorantur, ubi eandem gravitatem specificam cum aëre ambiente obtinent (§. II.), ibique tam diu subsistunt, donec illud æquilibrium mutatur (§. VIII.); nubes vero ex copiosis vaporibus constant (§. X.): sequitur, omnes illas causas propellere nubes, quæ vapores commovere valent. Plurimum huc contribuit *calor Solis*, qui non solum aërem ipsum attenuat, sed etiam ventos producit (*Exercit. N. de Ventis*, §. 4.), quorum ope nubes ad omnes Mundi plagas plus minusve fortiter agitantur. Videntur autem nubes superiores inferioribus lentius moveri, etiam si pari celeritate ferantur, quam fallaciam regulæ Opticæ demonstrant.

#### §. XIV.

Refert *Varenius* in sua *Georg. Lib. I. Cap. 10. Prop. 3.* quod *vertex montis el Pico in insula Teneriffa supra nubes attolli videatur manifesta*, cum hæc medium montem cingant, & *vertex extare supra hanc nebulam conspiciatur*. Æquat autem iste mons, Europæ altissimus, perpendiculariter unum milliare Germanicum: quare nubium altitudo non facile dimidium milliare Germ. excurrere constat. Consentiant *Ricciolus* in *Geogr. reform.* *Keplerus* in *Epitome Astron.* *Copern.* alique, qui altitudinem nubium calculo explorarunt.